



## 挨躉披波

一看著你蹶上吾个苦瓜藤，佢黏邊想愛膠你捉走，就驚怕你同吾个心血打爽忒。佢兩隻手指遽遽伸啊過去，無想著你也恁煞手，同佢夾一聲，痛到佢喊阿姆哀。佢兩隻手指遽遽膠你拂(fin)開，你歸隻圓身跌落地泥面，啪一聲，怙怙！無呻半句。黏邊，你兩隻拳頭嫻搭到緬緬，手擎擎仔愛搥(zemˊ)佢，害佢走到尾瀉屎。

佢從細到大就當驚你。印象裡背，係有一擺，佢同阿婆行到菜園去，阿婆摘菜、淋菜，佢在屑項搞。生到像菜葉、草葉个你，分佢拈到手巴掌項搞。你想愛蹶走，離開吾个手巴掌，佢毋肯。佢手伸出，兩隻手指愛膠你夾轉來，無想著你翻轉身嘴咬、手夾，咬到佢痛、夾到佢噉。阿婆喊佢煞煞同你拂走，緊拂毋知幾多下，正膠你拂開，離開吾个手指，離開吾个身項。手指面項个皮肉，分你搥到紅漬漬，該紅漬漬、痛那那(na)仔个印象，到今還深深刻在吾个腦屎肚。

毋知係毋係新仇帶舊恨，一看著你，佢就想愛膠你逐走，不管係這下抑係未來。毋過，你也毋係軟腳馬，聽講你另外安名老虎哥，就知你也毋係恁該對付个！兩支長長、利利个腳，像鉗仔乜像剪刀，係分佢憑著，定著又鉗又剪；一對凸凸、叮叮个目珠，同佢對望兩下，黏邊想愛撇走。淨這身影、這形容，就做得嚇死當多人，佢心肝肚當知，你正經毋係好看相定定！

佢還係毋甘願，看你恁自然，在吾个苦瓜藤項輕輕鬆鬆又夾又吮吾个心血，還有吾个盼望！想辦法，佢也愛膠你除忒，係無，也愛喊你離開吾个苦瓜藤、吾个菜園！永久，毋會再分你夾著，毋會喊痛。

轉到屋下，準開電腦上網去查，到底愛仰般來對付你！無想著一查正知，你蹶上吾苦瓜藤毋係愛吮忒吾个心血，夾忒吾个盼望！乜毋係愛變麼个鬼、搥麼个東西！你係愛來膠佢搥手除蚜蟲、逐果蠅這兜个。換句話講，你係來照顧吾个心血、實現吾个想望个！佢實在當失禮，毋知又假會，害你好心著雷打，佢想你該下跌落地泥面，勸勸(sanˊ)个時節，心肝肚定著緊罵佢，正經係人頭豬腦……。

作者：邱一帆

## ☆詞彙學習☆

【挨躉披波】aiˊ lungˊ piˊ poˊ：螳螂。

【煞手】sadˊ suˊ：手腳很快。

【緬緬】henˊ henˊ：緊緊的。

【搥】zemˊ：以拳頭擊打。

【煞煞】sadˊ sadˊ：儘快。

【腦屎肚】noˊ siiˊ duˊ：腦海裡。

【叮叮】dangˊ dangˊ：張眼直視。

【好看相】hoˊ kon xiong：外表好看。

【該下】ga ha：剛才。

【勸勸】sanˊ sanˊ：疲累、沒有元氣的樣子。